

დამტკიცებულია
საქართველოს პროფესიონალ ბუღალტერთა
და აუდიტორთა ფედერაციის გამგეობის
სხდომაზე, # 3 28.07.2011
(კოდიფიცირებული 20.04.2018)

საქართველოს პროფესიონალ ბუღალტერთა და აუდიტორთა ფედერაცია

დ ე ბ უ ლ ე ბ ა

სხვა ქვეყნის სერტიფიცირებული პირის აღიარების შესახებ

1. ზოგადი დებულებები

- 1.1. სხვა ქვეყნის სერტიფიცირებული პირის აღიარების წესები (შემდგომში წესები) შემუშავებულია საქართველოს პროფესიონალ ბუღალტერთა და აუდიტორთა ფედერაციის (ბაფი) განათლების კომიტეტის მიერ, “ბუღალტრული აღრიცხვის, ფინანსური ანგარიშგებისა და აუდიტის შესახებ” საქართველოს კანონისა და პროფესიული სერტიფიცირების სტანდარტის მოთხოვნების საფუძველზე.
- 1.2. წესები არეგულირებს სხვა ქვეყნის პროფესიული ორგანიზაციის მიერ სერტიფიცირებული პირის ბაფის მიერ საქართველოში პროფესიონალ ან/და სერტიფიცირებულ ბუღალტრად აღიარებას.
- 1.3. წესების მიზანია, დაადგინოს სხვა ქვეყნის სერტიფიცირებული პირის საქართველოში პროფესიონალ ან/და სერტიფიცირებულ ბუღალტრად აღიარების ძირითადი პრინციპები და პროცედურები.

2. ტერმინების განმარტება

- 2.1 ამ წესებში გამოყენებულ ტერმინებსა და ცნებებს აქვთ შემდეგი მნიშვნელობა:

სხვა ქვეყნის სერტიფიცირებული პირი - ფიზიკური პირი, რომელიც ეკონომიკური განვითარების და თანამშრომლობის ორგანიზაციის (OECD) წევრ ქვეყნებსა და ევროკავშირის წევრ ქვეყნებში არსებული ბუღალტერთა საერთაშორისო ფედერაციის (IFAC) წევრი პროფესიული ორგანიზაციის მიერ აღიარებულია პროფესიონალ ბუღალტრად ან სერტიფიცირებულ ბუღალტრად ან მათი საკვალიფიკაციო მოთხოვნის იდენტურ სერტიფიცირებულ პირად.

აღიარების მაძიებელი პირი (მაძიებელი) - სერტიფიცირებული პირი, რომელიც გამოხატავს სურვილს, საქართველოში პროფესიული მომსახურების გასაწევად აღიარებული იყოს პროფესიონალ ბუღალტრად ან სერტიფიცირებულ ბუღალტრად.

პროფესიული მომსახურება - მომსახურება, რომელიც მოითხოვს ბუღალტრულ და მასთან დაკავშირებულ უნარებს, როდესაც აუდიტორი/აუდიტური ფირმა ახორციელებს მომსახურებას საბუღალტრო, აუდიტორული, საგადასახადო, ფინანსური მენეჯმენტის ან ბიზნესსაკონსულტაციო სფეროში.

კომპეტენცია - საკითხთა წყება, რომელთა ჯეროვანი ცოდნა აქვს ვინმეს.

3. აღიარების პრინციპები

- 3.1 ეს წესები გამოიყენება სხვა ქვეყნის სერტიფიცირებული პირის საქართველოში პროფესიონალ ბუღალტრად ან სერტიფიცირებულ ბუღალტრად ცალმხრივად აღიარებისათვის და არ მოიცავს იმ შემთხვევას, როდესაც ბაფსა და სხვა ქვეყნის პროფესიული ორგანიზაციის მიერ თავიანთი სერტიფიცირებული პირების ურთიერთაღიარება ხდება, ორმხრივად გაფორმებული მემორანდუმის საფუძველზე.
- 3.2. “**ბუღალტრული აღრიცხვის, ფინანსური ანგარიშგებისა და აუდიტის შესახებ**” საქართველოს კანონის შესაბამისად, ბაფი სერტიფიცირებულ ბუღალტრად აღიარებს ეკონომიკური განვითარების და თანამშრომლობის ორგანიზაციის (OECD) წევრ ქვეყნებსა და ევროკავშირის წევრ ქვეყნებში არსებული ბუღალტერთა საერთაშორისო ფედერაციის (IFAC) წევრი ორგანიზაციების წევრ ფიზიკურ პირებს, რომლებსაც აუდიტის საქართველოში ჩატარება სურთ.
- 3.3 ბაფის მიერ სერტიფიცირებულ ბუღალტრად აღიარების საფუძველია მაძიებელი პირის (შემდეგ მაძიებელი) პირადი განცხადება.
- 3.4 აღიარების მიზანია არარეზიდენტი ან/და უცხო ქვეყანაში სერტიფიცირებული რეზიდენტი პირებისათვის:
- ა) ისეთივე პრივილეგიების უზრუნველყოფა, როგორი პრივილეგიებითაც სარგებლობენ ბაფის პროფესიონალი ბუღალტრები და სერტიფიცირებული ბუღალტრები;
 - ბ) საქართველოში აუდიტორული მომსახურების სფეროში საქმიანობის იმ ბარიერების მოხსნა, რომელიც შესაძლოა დაკავშირებული იყოს პროფესიულ კვალიფიკაციასთან.
- 3.5 სხვა ქვეყნის სერტიფიცირებული პირის კვალიფიკაციის აღიარების კრიტერიუმები არ უნდა აღემატებოდეს იმ კრიტერიუმებს, რაც აუცილებელია მომსახურების ხარისხის უზრუნველსაყოფად და ბაფის მიერ დადგენილია პროფესიული სერტიფიცირებისა და პროფესიონალი ბუღალტრის ან/და სერტიფიცირებული ბუღალტრის სტატუსის მინიჭებისათვის.
- 3.6 სხვა ქვეყნის სერტიფიცირებული პირის კვალიფიკაციის აღიარება ეფუძნება ბუღალტერთა საერთაშორისო ფედერაციის მიერ დადგენილ და ბაფის მიერ აღიარებულ პროფესიული კვალიფიკაციის ძირეულ კომპონენტებს, რომელიც გაერთიანებულია სამ ძირითად სფეროში: განათლება, გამოცდები და გამოცდილება.
- 3.7 აღიარების პრეტენდენტი უნდა აცნობიერებდეს, რომ მოეთხოვება საქართველოს სამართლის საკვალიფიკაციო ტესტის ჩაბარება ქვეყნის კანონმდებლობით დამკვიდრებული პრაქტიკისა ან/და მარეგულირებელ აქტებში კომპეტენციის გამოსავლენად.

4.1 სხვა ქვეყნის სერტიფიცირებული პირის კვალიფიკაციის აღიარებისათვის მაძიებელს მოეთხოვება დადასტუროს, რომ:

- ა) არის ბუღალტერთა საერთაშორისო ფედერაციის (IFAC) ნამდვილ წევრი ორგანიზაციის ან ეკონომიკური განვითარებისა და თანამშრომლობის ორგანიზაციის (OECD) წევრ ქვეყნებსა და ევროკავშირის წევრ ქვეყნებში არსებული ბუღალტერთა საერთაშორისო ფედერაციის (IFAC) წევრი ორგანიზაციების წევრი სერტიფიცირებული პირი;
- ბ) ჩაბარებული აქვს საქართველოს საგადასახადო კოდექსისა და ბიზნესსამართლის საკვალიფიკაციო გამოცდა.

4.2. ბაფი საქართველოს საგადასახადო კოდექსისა და ბიზნესსამართლის საკვალიფიკაციო გამოცდას ატარებს როგორც ქართულ, ასევე ინგლისურ ენაზე.

5 აღიარების პროცედურა

- 5.1 სხვა ქვეყნის სერტიფიცირებული პირის კვალიფიკაციის აღიარების საკითხს განიხილავს და გადაწყვეტილებას იღებს ბაფის განათლების კომიტეტი.
- 5.2 მაძიებელი ვალდებულია სერტიფიცირებულ ბუღალტრად აღიარებისათვის განცხადებით მიმართოს ბაფის განათლების კომიტეტს.
- 5.3 მაძიებელმა განცხადებასთან ერთად ბაფის განათლების კომიტეტს უნდა წარუდგინოს:
 - ა) პირადობის დამადასტურებელი დოკუმენტის ფოტოასლი;
 - ბ) სხვა ქვეყნის პროფესიული ორგანიზაციის მიერ გაცემული სერტიფიკატის ასლი;
 - გ) მტკიცებულება სხვა ქვეყნის პროფესიული ორგანიზაციის წევრობის შესახებ, რომელიც შეიძლება იყოს სხვა ქვეყნის პროფესიული ორგანიზაციის მიერ გაცემული ცნობა ან ვებგვერდის მისამართი, საიდანაც დასტურდება მაძიებლის წევრობა სხვა ქვეყნის პროფესიულ ორგანიზაციაში;
- 5.4 მაძიებელი აღიარების განცხადების განხილვამდე უნდა გახდეს ბაფის ასოცირებული წევრი.
- 5.5 მაძიებელმა განცხადებაში უნდა დაადასტუროს, რომ:
 - ა) იცნობს და აღიარებს ბაფის წესდებსა და წევრებისადმი დადგენილ მოთხოვნებს;
 - ბ) პროფესიონალ ბუღალტრად ან სერტიფიცირებულ ბუღალტრად აღიარების შემთხვევაში, აცნობიერებს, ბაფის ნამდვილ წევრად გახდომის ვალდებულებას და იმ ფაქტს, რომ აღიარების სერტიფიკატი ბათილდება, პირის მიერ ბაფის წევრობის დაკარგვის შემთხვევაში.
- 5.6 ბაფის განათლების კომიტეტი:
 - ა) მაძიებლის განცხადებას განიხილავს და გადაწყვეტილებას იღებს განცხადების მიღებიდან 10 სამუშაო დღის ვადაში;
 - ბ) სწავლობს მაძიებლის სერტიფიკატით დადასტურებული კომპეტენციის შესაბამისობას, ბაფის მიერ პროფესიონალი ბუღალტრის ან სერტიფიცირებული ბუღალტრის სტატუსის მისანიჭებლად დადგენილ მოთხოვნებთან;
 - გ) უფლებამოსილია, თუ ამ მუხლის მე-7 ნაწილის “ბ” პუნქტის მიზნებისათვის ელექტრონული წყაროებიდან ვერ მოიპოვებს სათანადო ინფორმაციას, მაძიებელს მოსთხოვოს ოფიციალურად დადასტურებული ინფორმაცია, სერტიფიკატის გამცემი პროფესიული ორგანიზაციის მიერ დადგენილი განათლების პროგრამისა და სასერტიფიკაციო პირობების შესახებ.

- 5.7 მაძიებლის განცხადების განხილვის შემდეგ, ბაფის განათლების კომიტეტი უფლებამოსილია მიიღოს გადაწყვეტილება მაძიებლის:
- ა) პროფესიონალ ბუღალტრად აღიარების შესახებ;
 - ბ) სერტიფიცირებულ ბუღალტრად აღიარების შესახებ;
 - გ) აღიარებაზე უარის თქმის შესახებ;
 - დ) დამატებითი ინფორმაციის წარდგენის შესახებ;
 - ე) საქართველოს ეკონომიკურ გარემოში ფუნქციონირებისათვის ბიზნესსამართლისა და საგადასახადო დაბეგვრის საკითხებში გამოცდის ჩაბარების მოთხოვნის შესახებ.
- 5.8 მაძიებლის განცხადების განხილვის შემდეგ მიღებულ გადაწყვეტილებას ბაფის განათლების კომიტეტი მაძიებელს აცნობებს 2 სამუშაო დღის ვადაში.
- 5.9 მაძიებელს აღიარების სერტიფიკატი გადაეცემა გადაწყვეტილების მიღებიდან 5 სამუშაო დღის ვადაში.
- 5.10 სხვა ქვეყნის სერტიფიცირებული პირი ვალდებულია, პროფესიონალ ბუღალტრად ან სერტიფიცირებულ ბუღალტრად აღიარების დღიდან 10 სამუშაო დღის ვადაში გახდეს ბაფის წამდვილი წევრი.

6 სპეციალური ნორმები

- 6.1 მაძიებლის აღიარება დასტურდება სერტიფიკატით. აღიარების სერტიფიკატის ესკიზს ქმნის ბაფის პროფესიული განათლების კომიტეტი.
- 6.2 აღიარებული პროფესიონალი ბუღალტრის და აღიარებული სერტიფიცირებული ბუღალტრის სერტიფიკატის ესკიზი უნდა იყოს განსხვავებული. სერტიფიკატში უნდა აღინიშნოს, რომ:
- ა) იგი არის აღიარებითი;
 - ბ) აღიარება მოხდა სხვა ქვეყნის პროფესიული ორგანიზაციის (მიეთითოს) სერტიფიკატის საფუძველზე; და
 - გ) ძალამოსილია მფლობელის მიერ ბაფის წევრობის შენარჩუნების პერიოდში.

7 დებულების ძალაში შესვლა

7.1. დებულება ძალაშია 2017 წლის 1 იანვრიდან